



**Här Fernand Etgen
President vun der Chamber**

Lëtzebuerg, den 29. Dezember 2022

Här President,

Esou wéi et am Artikel 80 vum Chambersreglement virgesinn ass, géing ech Iech bidden, dës parlamentaresch Fro un den Här Bildungsminister an un den Här Aarbechtsminister weiderzeleeden.

An der Conclusioun vum Debat public vum 6. Oktober 2021 zur Petitioun 1865 war festgehale ginn, datt sollte gratis Hygiènesartikele fir Fraen a Meedercher an de Schoulen zur Verfügung gestallt ginn. Doriwwereraus hat d'Regierung eng Sensibiliséierungscampagne ugekënnegt fir méi Versteestemech a Respekt op der Aarbecht an an der Schoul fir d'Fraen an d'Meedercher, wann si hir Regel hunn. An dem Zesummenhang géing ech gär folgend Froen un Här Bildungsminister an un den Här Aarbechtsminister stellen:

- Ass d'Conclusioun vum Debat public ëmgesat ginn?
 - Wa jo, stinn an alle Schoulen - am Secondaire an am Fondamental - gratis Hygiènesartikelen zur Verfügung?
 - Wéi vill Apparater sinn am ganzen installéiert ginn?
 - Wann nee, wéini gedenkt d'Regierung, d'Conclusioun vum Debat ëmzesetzen?
- Wéini leeft déi ugekënnegt Sensibiliséierungscampagne un a wéi wäert se ausgesinn?

Här President, ech bidden Iech mäin déifste Respekt unzehuelen.

Nancy Arendt, épouse Kemp

Deputéiert



Gemeinsam Äntwert vum Minister fir Educatioun, Kanner a Jugend, Claude Meisch, an dem Minister fir Aarbecht a Beschäftegung a fir Sozial- a Solidarwirtschaft, Georges Engel, op d'parlamentaresch Fro Nr. 7430 vun der honorabeler Deputéiert Nancy Arendt

Ad 1)

D'Conclusioun vum ëffentlechen Debat vum 6. Oktober 2021 zur Petitioun Nr. 1865 sinn aktuell an der Ëmsetzung. D'Installatioun vun den Distributeure fir gratis Menstruatiounsartikelen an de Lycéeën ass amgaangen, eng Sensibiliséierungscampagne iwwert d'Menstruatioun ass an der Planung a gëtt am Mäerz 2023 lancéiert. Fir méi detailléiert Informatiounen zu der Installatioun vun den Distributeuren an de Lycéeën, referéieren mir op d'Äntwert op d'parlamentaresch Fro Nr. 5350.

D'Schülerinne vum Lycée kënnen sech un de SePAS wenden, fir gratis Menstruatiounsartikelen ze kréien. Zousätzlech dozou ginn an all de Lycéeën Apparater installéiert, fir d'Verdeelung ze vereinfachen an ze favoriséieren. D'Dotatioun 2023 vun de Lycéeën ass erhéicht ginn, fir datt all Lycée sech bis zu 5 Apparater kann uneegnen.

Wat d'Mise à disposition vun Apparater fir Hygiènesartikelen an den ëffentleche Grondschoulen ubelaangt, esou fällt dëst ënnert d'Equipementer vum Schoulgebaai, déi laut de legalen Dispositiounen der Verantwortung vun de Gemengen ënnerlaien¹.

128 Apparater si bis elo an de Lycéeën installéiert ginn. Weider Apparater sinn amgaangen, bestallt an installéiert ze ginn, sou datt an all Lycée Apparater de Schülerinnen zur Verfügung stinn.

Ad 2)

Eng Sensibiliséierungscampagne zum Thema vun der Menstruatioun ass an der Virbereedung a wäert vum Mäerz 2023 bis zum 28. Mee 2023, dem Welttag vun der menstrualer Hygiène, lafen. D'Ëmsetzung vun der Campagne ass virgesinn an all den ëffentlechen edukative Strukture wéi Lycéeën an och Jugendhaiser.

Et ginn Affichen opgehaangen a Postkaarte verdeelt mat Informatiounen zu der Menstruatioun nom Prinzip vun "Eng Fro-Eng Äntwert" souwéi Stickere mat Slogane fir déi Jonk, fir den Tabu ronderëm d'Menstruatioun ze brieden. Op all Postkaart kënnst ee QR-Code drop, dee verlinkt ass mat der Plattform fir Léiermaterial www.heydoo.lu, wou zousätzlech Informatiounen fir Enseignanten zur Verfügung gestallt ginn. All Mount wäerten no an no, iwwer den digitale Wee, véier Froe publizéiert gi mat véier Äntwerten.

¹ Artikelen 35 an 58 vun der *Loi du 6 février 2009 portant organisation de l'enseignement fondamental*

De Ministère fir Aarbecht, Beschäftegung a fir Sozial- a Solidarwirtschaft, de Ministère fir Gläichstellung tëschent Fraen a Männer an d'UEL gesi sech och fir ze iwwerleeë wéi een d'Sensibiliséierungscampagne am beschte ka gestalten.

Lëtzebuerg, de 7. Februar 2023

De Minister fir Educatioun,
Kanner a Jugend

(s.) Claude MEISCH